

EDITORIAL

Agpinget iti pananglaban iti parigat, pasista ken aso-aso a rehimen Marcos

Iti panagleppas ti bulan, tumakder ni Ferdinand Marcos Jr iti sango ti Kongreso tapno balbaliw a pusipusen ti ulo ti umili seknan kadagiti "naaramid na" iti napalabas a tallo a tawen. Nakaat-atiddog ti lublubiden na nga inuulbod ngem saan na a makaluban ti awan-patengga a panangparigat na iti umili kabayatan ti panagari na. Awan sarday ti panagsuwek ti tukad ti panagbiag ti mayorya ti umili. Awan kapada ti korapsyon ti pamilya a Marcos. Bulag a sursurotena ti diktat ti amo na nga imperyalista a US. Kumarkaro ti pangpulitika a panangikuspil iti umili a tumaktakder ken lumablaba.

Ad-adda a panagsagaba ti kadowan nga umili ti ituntunda ni Marcos. Bakbaklayen latta ti umili ti nangato a presyo ti bagas, a saan a makaluban ti pammarang na. Kakunsabos ni Marcos dagiti kumpanya iti langis iti panagtayok ti presyo ti diesel ken gasolina. Iti laksid ti nasaknap a panawagan, linapdan ti Malacañang ti gakat a ₱200 a nayon iti inaldawan a sweldo dagiti mangmangged, ketdi, nayon pay a buwis ti naipataw iti abaga ti umili. Agsumbangir ti panagikkat iti trabaho, nasaknap ti disempleyo, ginasut a ribo ti mapwerpwera a mangged iti sabali a pagilyan, bayat a ginasut a ribo

a nakurapay ti mapatpatalaw iti pagtaengan da ken maag-agawan ti daga, pagkalapan ken dagiti pagtataudan ti pagbiagan da.

Ipatpatungpal ni Marcos dagiti patakaran ken programa nga ad-adda a mangbusbussog kadagiti gangannaet a dadakkel a kapitalista, ken dagiti kakunsabos na a dadakkel a burges kumprador, apo't daga ken burukrata kapitalista. Agsumbangir ti panagutang na a saan met a pakpakinabangan ti umili, nu di ket mapmapan laeng kadagiti pagpasin-dayaw a proyekto a pang-imprastruktura a pagalalaan ti kikkab na ken

dagiti korap nga upisyal na. Ginasut a bilyon a piso a tinakaw a kinabaknang dagiti Marcos ti naisubli iti kontrol da, bayat a ginasut a bilyon a piso ti makamkamkam babaen ti Maharlika Investment Fund ken dagiti *confidential* ken *intelligence funds* ni Marcos, ken mawalwaldas iti aglablabes a gastos iti militar, a mangkiskissay ti kasapulan la unay a serbisyo a panggimong.

Kas kadagiti napalabas a rehimen, pabpaboran ni Marcos ti dadakkel a gangannaet ken lokal a kapitalista tapno agakup da ti kadakkelan a ganansya. Ilanlansa ni Marcos ti sweldo dagiti mangmangged bayat a kalkaltasan na ti buwis dagiti kapitalista. Winayaan na ti gangannaet a panagtagikua iti daga iti Pilipinas (iti linged ti linteg a mangipalpalubos iti 99 a tawen a "panag-abang"), ken ik-ikkaten na dagiti regulasyon iti lawang tapno awan lapped a gam-



gamen ken dadaelen ti natural a kinabaknang ti pagilyan.

Ik-ikkan isuda ni Marcos ti armado a proteksyon ti militar ken pulis, a maar-aramat iti panangipawil iti umili a mangsalsalaknib iti daga ken pagbiagan da. Iti kasyudadan, punpuntiryaen dagiti pasista a gamat ti reaksyunaryo nga estado dagiti mangmangged nga agun-union ken tumaktakder tapno ilaban dagiti kadawatan da a nayon a sweldo. Ar-aramaten ni Marcos ti NTF-Elcac ken ti "Anti-Terrorism Law" iti panangpawil kadagiti karbengan dagiti mangmangged, mala-mangmangged, kabataan-estudyante, mangngalap, babbai ken dadduma pay a demokratiko a sektor tapno lapdan isuda nga agorganisa ken makipaset iti tignay para iti panagbalbaliw ti gimong.

Iti kaaw-awayan, sipaparang ti terorismo ti estado iti panangipataw ti linteg militar kadagiti barangay ken komunidad, nga ibagbaga ti NTF-Elcac a sumupsuporta iti armado a rebolusyonaryo a tignay. Agsusumbangir ti ekstrahudisyal a pammapatay, pammutbuteng, pananghalughog kadagiti kabalbalayan, iligal a panagaresto, "panagpasurender," awan turturong na a panagpappaputok ti paltog, panagkanyon ken panagitenag ti bomba kadagiti taltalon ken

banbantay nga asideg kadagiti komunidad. Ubbing man wenno natataengan, awan ti pilpilyen a biktima ti brutalidad dagiti pasista a tauhan ni Marcos. Karungsotan ti panagikuspil ti rehimen Marcos kadagiti nasulinek a baryo ken sityo dagiti mannalon ken katutubo nga umili, nga ag-agan ti daga dagiti gangannaet a kumpanya iti panagminas, dagiti plantasyon, proyekto a pang-enerhiya ken eko-turismo.

Ar-aramaten ni Marcos ti karatula ti "kapy" tapno kaluban ti gera ti panangpawil daytoy iti patriyotiko ken demokratiko a tignay ti umili a Pilipino. Daytoy ti tarigagay dagiti imperyalista ken agar-ari a dasig a "kapy" a naapput ti ngiwat dagiti maidadanes ken magungundawayan. Daytoy ket saan a nainkalinteg ken pangmabayagan a kapy a tarigagay ti umili, a magun-od laeng babaen ti panangsungbat kadagiti basaran a kadawatan da para iti libre a pannakaiwaras ti daga, nailyan nga industriyalisasyon, pudno a wayawaya ken demokrasya.

Iti duron ti amo na nga imperyalista, inmandar ni Marcos a pairtengen ti gera tapno kano dupraken ti New People's Army. Todo-todo ti pannakikumplot ni Marcos ken ti AFP iti pwersa a militar ti US iti panangip-

westo daytoy kadagiti tropa, lugan ken armas militar iti Pilipinas ken iti panangisayangkat ti agsasaruno a panagsanay iti gera a mangpunpuntirya iti China. Imbes a wayaan ti natalinaay a dayalogo iti China, ad-adda a pabpabaraen ti rehimen Marcos ti armado a tensyon iti South China Sea.

Awan ti manamna ti umili a Pilipino iti parigat, pasista ken aso-aso a rehimen Marcos. Bayat a nakatugaw ni Marcos iti Malacañang, aramaten na ti poder na tapno adadda pay a gamruden ti kinabaknang ti pagilyan, paatiddogen ti turay na ken makidinnuron kadagiti karibal na iti pulitika. Awan sabali a pagkamanangan ti umili nu saan a tumakder ken lumaban iti rehimen US-Marcos.

Kasapulan a palawaen ken patibkeren ti umili ti organisado a pigsa da. Iti kasyudadan, nasken nga ipanamin a pigsa a pagkaykaysaen dagiti mangmangged, mala-mangmangged ken dagiti kabataan-estudyante kas pagbatayan ti pigsa, kasta met dagiti dadduma pay demokratiko a sektor. Rumbeng a paregtaen dagiti demokratiko ken anti-imperyalista a dangadang ti masa kadagiti pabrika, komunidad ken pagadalan.

Iti kaaw-awayan, kasapulan a pigsaen ken palawaen ti hukbo ti umili ken dagiti sangay ken komite ti seksyon ti Partido tapno sipipinget a buklen wenno balbaliw nga itakder dagiti timpuyog ti mannalon tapno agdependa laban iti pasismo ken tapno iyabante dagiti dangadang laban kadagiti pyudal ken malapyudal a panaggundaway ken papigsaen ti pukkaw para iti pudno a reporma iti daga. Nasken a paregtaen ti panangisayangkat kadagiti taktikal nga opesiba ken espesyal nga operasyon tapno dusaen ti napeklan a pasista ken tungpalen ti dawdawat ti umili a hustisya.

Awan sabali a maiparbeng a sungbat ti umili a Pilipino nu saan a ti panangparegta ti tignay masa ken armado a dangadang tapno labanan ti panangidadanes ken panagikuspil ti rehimen US-Marcos. Iti awan panakauma a panagpinget iti dana ti panaglabaan, sigurado a mapagsungbat ni Marcos ken sangwen na ti panaghusga ti intero nga umili.



Tawen LVI No. 13 | Hulyo 7, 2025

Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tay.

Linaon

Editorial: Agpinget iti panaglabaan iti parigat, pasista ken aso-aso a rehimen Marcos 1

Tignay panagilinteg iti Southern Tagalog 3

Plano a pabrika ti bala ti US, sinupyat 4

Managdadael a kwari, pinaralisa ti NPA 4

Dagiti protesta 4

Proyekto nga SCMB Railway ken LEC para iti US 5

Militante a sagudayen ti Pride March iti Pilipinas 6

Iti ababa a sarita 7

Padagsen a buwis iti umili 8

Malapyudal a panangidadanes kadagiti mannalon 9

Pammapatay kadagiti sibilyan ken *hors de combat* 10

Pudno a kapy, naiyawag 10

Tignay protesta idiaq Kenya, naranggas a naduprak 10

Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan

 ang.bayan@cpp.ph

Tignay panagilinteg idiyay Southern Tagalog: Ipapuso ti teorya, agadal iti bukod a praktika

Iti tengnga ti awan-ressat nga operasyon-militar manipud 2024, balligi a naisayangkat iti maysa a larangan gerilya idiyay Southern Tagalog ti maysa a kumperensya iti gawaing masa ken trabaho iti militar. Kangrunaan a panggep ti panagtutipon dagiti yunit ti New People's Army (NPA) nga aglagom ken agbibinningay kadagiti kapadasan tapno nasaysayaat a masango ti kumarkaro a kampanya a panagrebbek ti Armed Forces of the Philippines (AFP) iti subrehiyon. Kabilang ditoy ti naglalaok a natataengan, makintengnga ken agkakabanwag a kadre. Nasurok kagudwa ti nakipaset ket agtutubo.

Agadal, agilinteg, umabante

Naluktan ti kumperensya iti panagadal iti dua a kaso a maadal iti gawaing masa. Naadaw ditoy ti kapadasan ti dua a yunit ti Hukbo iti nasurok-kumurang a makatawen. Mayor a punto a napagtalantanan ti manera dagiti yunit iti gawaing masa: ti panangbalanse iti trabaho a panagpalawa ken panagpauneg, ken ti kabayag ti panagkampo dagiti yunit ken kaasideg dagitoy kadagiti lugar a nakakonsentraan ti masa. Natadem a natudo ti konserbatismo iti gawaing masa ken paboritismo kadagiti base a mailininteg tatta.

Natudo ti tulbek a papel ti trabaho iti edukasyon, propaganda, kultura ken trabaho a medikal iti epektibo, nauneg ken nasaknap a gawaing masa. Maysa a nasayaat nga ehemplo daytoy ti panangbukel ti maysa nga iskward ti praymer iti maysa a munisipalidad a mangtalantanan iti agdama a sitwasyon ken parikut ti masa karamanen ti nabaknang a rebolusyonaryo a pakasaritaan ti munisipalidad manipud iti panagsukisok iti gimong. Epektibo a naaramat ti praymer tapno pagkay-

kaysaen ti masa ken itakder dagiti grupo ken balangay dagiti rebolusyonaryo nga organisasyon ti masa iti nasao nga ili.

Naipunto met ti kinapateg ti pannakipaset ti Hukbo iti produksyon ti masa ken panangipaay kada kuada ti serbisyo a medikal iti gawaing masa. Kadagiti positibo ken negatibo a kapadasan a nailanad, limmatak ti mapanggeddeng a papel ti usto a panangidaulo ti Partido ken ti natibker a panagkaykaysa tapno maiyabante ti Hukbo ti gawaing masa iti laksid dagiti tubeng, kinarigat ken agbaliw-baliw a kasasaad. Kalpasan ti panangilanad kadagiti kaso a maadal, rinebyu da ti "Dagiti Basaran Prinsipyo iti Gawaing Masa iti Kaaw-awayan."

Sumaruno a nailanad ken napagtalantanan dagiti kaso a maadal agpada kadagiti naballigi ken napaay a taktikal nga opensiba karaman dagiti sumagmamano a depensiba a labanan. Tampok kadagiti kaso a maadal ti kinapateg ti trabaho iti paniktik ken panag-organisa ken panagpatignay iti masa para iti daytoy a trabaho.

Kas iti gawaing masa, nalatak kadagiti kaso a maadal ti pagkasapuln iti absoluto a panangidaulo ti Partido iti Hukbo tapno pairuten ti panagkaykaysa anyaman a kasasaad ti sangwen. Nu awan ti kastoy a panangidaulo ti partido, saan a maaramid ti nasayaat a panagdepensa laban iti kabusor ken panagrebbek ditoy nga isu ti kangrunaan a rebbenngen ti Hukbo. Kalpasanna ket inadal da ti "Dagiti Usapin iti Estratehiya iti Rebolusyonaryo a Gubat ti China" ni Mao Zedong.

Adda iti bugas ti panaglagom kadagiti kapadasan iti gawaing masa ken militar ken panangrepaso iti teorya kanaig ditoy ti panangsippaw ken panangpauneg dagiti kadre iti pannakaawat da kadagiti basaran a prinsipyo ti pannakigubat a gerilya iti tukad ti estratehiko a depensiba ken iti kasasaad a balbaliw nga agpappapigsa ti NPA manipud iti panag-atras nga inbunga dagiti pang-uneg a pagkapuyan ken iti panangsango iti atake ti kabusor.

Nagisayangkat ti kapehan iti sumagmamano a sesyon iti rabii nu saddinno a naibingay ti kapadasan iti panagpasampa kadagiti agtutubo a mannalon, katutubo ken intelektwal. Nangted daytoy kadagiti balitok nga adal ken inspirasyon nu kasano a paregtaen ti panagpasampa iti NPA ken nu kasano a patibkeren ken palaingen dagiti Nalabbaga a mannakigubat iti tengnga ti pukpukan a panakilaban iti kabusor.

Tapno ramuten iti ideolohiya dagiti pagkapuyan ken parikut, naadal met ti "Espesyal a Kursu iti Empirismo" ken "Kanaig iti Praktika" ni Mao. Gagem daytoy nga epektibo a puntiryaen ti empirisista a tendensya ti panagpanpanunot ken aramid a naipakita kadagiti kaso a maadal. Partikular a rupa daytoy ti panagpaakaanay iti nasina-sina a datos kanaig iti kasasaad ken pagbiagan ti ma-

Suruten iti panid 4



**Plano a pabrika ti bala ti US, tuluy-tuloy
a war games, masupsupyat**

NAGIYEBKAS TI PANAGSUPYAT ken panagdanag ti nadumaduma a grupo laban iti gakat iti Kongreso ti US nga agitakder ti pabrika ti bala iti Subic Bay, Zambales. Kunada, daytoy a plano ket pangta iti nailyan a seguridad ken makaapektar iti pagbiagan dagiti mangngalap iti Zambales.

Rimwar ti plano a panagitakder ti pabrika iti maysa nga ulat ti US House Committee on Appropriations a naisapubliko idi Hunyo 24.

"Iti pakasaritaan, saan a ti daga ti US ti target dagiti kabusor daytoy a pagilyan, nu di ket dagiti base militar ken dagiti satelayt a base daytoy iti sabali a lugar," kuna ti Pamalakaya.

Binabalaw met ti Kilusang Magbubukid ng Pilipinas (KMP) ti in-sayangkat ti US nga Operation Lightning Strike war games idi Hunyo 30 idia Palayan City, Nueva Ecija iti sidong ti Salaknib Phase 2. Pinabettak da iti daytoy a war games ti dua a High Mobility Artillery Rocket System (HIMARS) ken nagusar da ti uppat nga Apache attack helicopter.

Kuna ti grupo, napeggad dagitoy a war games kadagiti komunidad ti mannalon, nangrunan dagiti live-fire missile test. Mamati ti KMP a daytoy ket saan a para iti depensa wenno kapya nu di ket paset ti panagsagana ti US para iti gera.

Kabayatanna, nagmartsa idia Sydney, Australia dagiti Pilipino ken Australian idi Hunyo 22 kas panangbatikos iti naisayangkat a Pilipinas-Australia Kasangga war games. Dua a daras kada tawen a naisayangkat manipud 2023 ti Kasangga nu sadinno a nawaya a makaserserrek dagiti tropa nga Australian iti teritoryo ti Pilipinas.

Manipud iti panid 3

sa, narabaw a panangammo iti rebolusyonaryo a pakasaritaan dagiti erya ken naata a paniktik. Nalawag iti kapadasan ti larangan a ti saan a panangkumpleto ken kinakurang iti panangbukel iti panagsukisok iti gimong ken panagamiris iti dasig ket agbungbunga kadagiti saan nga umannatop a patakaran ken programa iti pulitika ken dagiti plano a militar.

Iti panagleppas ti kumperensya, nangted dagiti kakadwa kadagiti repleksyon da. Segun ken Ka Lima, "Kasapulan nga iwaksi ti suhetibismo ken indibidwalismo iti tunggal linabag ti kinatao tayo, ti arogansya ken ti kina-kampante iti amin nga aspeto. Nalaka iti sarita, ngem karit iti aktwal. Baliwan tayo ti wagas ti panagpanpanu-not tapno agbalin a nasirib ti panagamiris tayo kadagiti banag ken agbalin nga usto dagiti addang tayo iti panagrisut kadagiti parikut."

"Lumaban tapno agpapgisa! Agpapgisa bayat a lumablaban!" Daytoy ti awag ti tignay panagilinteg kadagiti rebolusyonaryo iti Southern Tagalog.

Iti laksid ti sangwen a kasasaad militar, nangato ti pangnged-deng dagiti Nalabbaga a kumander, giya iti pulitika ken mannakigubat idi agsisina dagiti yunit para kadagiti baro a trabaho nga intu-ding ti kumperensya. Nalawag ti karit para iti Partido ken Hukbo iti agdama a kritikal a tukad ti rebolusyonaryo a tignay: Baklayen ti umad-ado ken dumakdakkal a trabaho ken sakripisyo nga addaan natibker a pakinakem iti panagserbi iti umili ken talek iti kinausto ken panagballigi ti rebolusyon.

AB

**Managdadael a kwari,
pinaralisa ti NPA-Negros**

PINARALISA KEN PINUORAN ti New People's Army (NPA)-South Central Negros (Romeo Nanta Command) ti dua a dump truck ken maysa a backhoe a maus-usar iti managdadael nga operasyon a kwari iti Sityo Medel, Barangay Carabalan, Himamaylan City, Negros Occidental idi Hulyo 4. Dimmanon iti ₱11 milyon ti danyos iti operasyon.

Inpatungpal daytoy ti NPA kas panangsalaknib iti komunidad ken lawang gapu ta nabayagen a mangperperwisyo ti kwari. Gapu iti kwari, naapektaran dagiti talon ken pagbiagan dagiti residente a nakasanggir iti karayan.



Tignay iti maika-3 tawen ni Marcos. Nagmartsa idi Hunyo 30 agturong iti Mendiola idia Manila dagiti nailyan-demokratiko nga organisasyon tapno babalawen ken singiren ti rehimen Marcos iti okasyon ti maikatlo a tawen daytoy iti poder. Binatikos da ti panagpakaaso-aso ti rehimen iti imperyalismo a US, dagiti parigat a patakaran, pasista a panagikuspil ken dagiti inutil a patakaran. Kapada a protesta ti naisayangkat idia Baguio City ken Iloilo City.

Piket kontra panagikkat ti SkyCable. Nagpiket ti SkyCable Supervisors, Professionals/Technical Employees Union (SSPTEU) idi Hunyo 24 iti batog ti kumpanya idia Quezon City tapno supyaten ti panagikkat kadagiti mangmangged ti SkyCable Corporation. Saan a bumaba iti 133 kameng ti unyon ti posible a masisante, malaksid pay kadagiti mangmangged a saan a kameng ti unyon.

Panagsupyat iti demolisyon kadagiti floating house idia Cavite. Nagprotesta dagiti mangngalap a kameng ti Pambansang Lakas ng Kilusang Mamamalakaya ng Pilipinas (Pamalakaya) iti igid-baybay ti Bacoar City idi Hunyo 24 tapno supyaten ti pangta a demolisyon kadagiti balay da a nakatakder iti baybay. Mapatta-patta a nasurok 100 a pamilya ti mapadisi iti demolisyon. Ti demolisyon ket kanaig ti plano a 420-ektarya a reklamasyon a proyekto ti Frabelle Fishing Corporation ken ti lokal a gubyerno.

Proyekto nga SCMB Railway ken LEC, agserbi iti interes ti imperyalismo a US

Pinirmaan idi Hunyo 26 ti rehimen Marcos ken ti US Trade and Development Agency (USTDA) ti katulagan para iti panagpautang ti gubyrno a US ti \$3.8 milyon para iti pakauna a panagsukisok ken panagadal iti proyekto a Subic-Clark-Manila-Batangas (SCMB) Railway. Panggep ti proyekto nga agiyaplag ti sistema ti riles para iti transportasyon dagiti tagilako tapno kisasayan kano ti panagseseksek iti sangladan ti Manila.

Iti kaatiddog a 250 kilometro, pagsisilpoen ti SCMB Railway ti Subic ken Clark, agtarus iti National Capital Region agingga iti sangladan ti Batangas. Basar iti plano ti USTDA, mangrugi inton 2027-2028 ti konstruksyon ti paset ti Subic-Clark, ken inton 2028-2029 ti konstruksyon ti paset ti Clark-Manila-Batangas. Target daytoy a rugyan ti operasyon ti riles iti masapa a paset ti 2030. Mapatta-patta a dumanon ti \$3.2 bilyon ti gatad ti intero proyekto.

Umuna nga indyaya ti rehimen Duterte ti proyekto a riles iti nagbaetan ti Subic ken Clark iti gubyrno ti China idi 2016. Nagkari ti China idi 2018 a pondoan daytoy ngem inbabawi na idi 2022. Iti panagtugaw ti rehimen Marcos iti poder, riniing ken pinaatiddog da daytoy agingga Batangas iti sugsoq ti US.

Naipasidong daytoy a proyekto iti naawagan a Luzon Economic Corridor (LEC), maysa a trilateral a programa iti nagbabaetan ti US, Pilipinas ken Japan nga addaan panggep a papardasen ti panagitambak ti kapital, tauhan ken

ramit da iti langa dagiti proyekto nga imprastruktura iti renewable energy, sangladan, eropwerto, rangtay ken dalan. Ti LEC ti umuna a proyekto ti Partnership for Global Infrastructure and Investment ti US ken kangrunaan a paset ti estratehiya daytoy iti Indo-Pacific laban iti China, partikular kontra iti Belt and Road Initiative daytoy.

Malaksid iti SCMB Railway, naisidong met iti LEC ti 27 a dadduma pay a proyekto nga imprastruktura kabilang ti panagpalawa ti Clark International Airport, Bataan-Cavite Interlink Bridge, Subic Bay (Redondo-Ilanin) Bridge, Central Luzon Link Expressway, North Luzon East Expressway, Laguna Lakeshore Road Network Development, Kalaanan Irrigation Project, North-South Commuter Railway, New Clark City Extension Railway ken Southern Batangas Airport.

Ti SCMB Railway ken dadduma pay nga imprastruktura ket maitakder tapno aramaten dagiti gangannaet a kumpanya, kas kadagiti kumpanya nga Amerikano iti panagmanupaktura ken baterya a kayat na nga agnumar iti nababaknang a rekursor ti *nickel, cobalt, copper* ken *bauxite* ti Pilipinas.


Target ti US, kadwa na ti Japan ken dagiti pagilyan ti NATO nga agitambak ti

agingga \$100 bilyon a kapital iti sumaruno a 10 tawen. Kaadwan ti daytoy a pondo ket aglanga nga utang ken pribado a kapital, a maisalbar babaen ti panagbuwis ken awan ti direkta a silpo na iti lokal nga ekonomya.

Kagiddan kadagiti panggep daytoy iti ekonomya, ti SCMB Railway ken dadduma pay a proyekto iti sidong ti LEC ket addaan nalawag a panggep a pangmilitar ken heyopolitikal. Pagsisilpoen ti SCMB Railway ken ti network dagiti rangtay ken dalan dagiti dadakkel nga "EDCA site" wenno dagiti base militar ti US iti Luzon, ken pasayuden na ti panagiyakar-akar kadagiti armas, tropa ken militar a lugan kadagitoy. Pasayuden na met ti transportasyon ti militar iti dadduma pay a paset ti Luzon. Kabayatanna, ti panangpalapad iti eropwerto iti Clark ket agserbi kadagiti eroplano a panggubat ti US, a tatta ket addaanen ti nalalawa a *hangar* ken paradaan iti kaabay na a Basa International Airport.

Nalawlawag ti panggep a militar ti LEC iti anunsyo itay nabiit ti Kongreso ti US a plano a panagitader ti pabrika ti bala iti uneg ti Subic. Sakbay daytoy, nagabangen ti dakkel a bodega ti US iti Subic tapno ipwesto ti ramit-militar a kampay idi ket paset ti panagsagana kadagiti didigra.

Labes iti Pilipinas, ti LEC ket paset iti nalawlawag nga estratehiya ti US tapno lapdan ti lumawlawag nga impluwensya ti China iti Southeast Asia. Numanpay agtaltalinaed a dominate ti panagpuonan ti US iti rehion, adu a pagilyan ditoy ti pumabpabor iti panagpuonan ti China para iti dadakkel a proyekto iti imprastruktura, panagmanupaktura ken panagminas, iti kasta ket saan nga agrikrikep kadagiti heyopolitikal a panggep daytoy. Saan a kas ti Pilipinas, lumikliklik dagiti pagilyan iti ASEAN a maigalut iti eksklusibo nga alyansa a militar iti US.



Arakupen ti militante a sagudayen ti Pride March iti Pilipinas

Iwagwagayway dagiti bulalayaw a bandera ken nakatag-ay ti gemgem a nagmartsa ti ginasut a kameng ti sektor ti LGBTQ+, dagiti alyado ken progresibo a grupo idi Hunyo 26 iti Stonewall Philippines Pride March a naisayangkat idiay Recto Avenue, Manila. Nakidinnuron da kadagiti pulis tapno ipanagetget ti panagisayangkat ti programa iti Mendiola.

Iti panangiyuna ti nailyan-demokratiko a grupo dagiti LGBTQ+ a Bahaghari, binukel dagiti pormasyon a Pride (agramrambak iti bulan ti Pride) ti Stonewall Philippines. Pormal nga indeklara ti baro a timpuyog ti tinawen a panangidaulo kadagiti militante nga aktibidad ken martsa para iti Pride tunggal Hunyo.

Padpadayawan ken isabsabiag ti Stonewall Philippines ti patawid ti kaunaan a Pride March iti Pilipinas ken uray iti Asia—ti Stonewall Manila a naisayangkat idi Hunyo 26, 1994 idiay Quezon City. Inyuna ti Progressive Organization of Gays in the Philippines (ProGay), kabadang ti Metropolitan Community Church (MCC) ti militante a martsa ken nagbalin daytoy a mitsa ti mano a dekada ti dangadang ti LGBTQ+.

Kagiddan ti panawagan laban iti diskriminasyon iti LGBTQ+ ken panangitandudo kadagiti karbengan ti sektor, timmakder da idi laban iti parigat a Value Added Tax (VAT), pananggato ti presyo ti langis ken gagatangen ken inbunanag da dagiti kontra-umili a patakaran iti rehimen US-Ramos.

Tallo pulo ket maysa a tawenen ti napalabas, iyaw-awag tatta ti sektor ti panangpasinged kas linteg iti SOGIE Bill, makabiag a sweldo, trabaho, pudno a reporma iti daga ken nailyan nga industriyalisasyon ken independyente a patakaran a pangruar, wayawaya ti Palestine ken dagiti pagilyan nga idadanes ti US. Pinadayawan da dagiti martir ti sektor ti LGBTQ+ a nagserbi nga organisador ken aktibista kas kada Alex Dolorosa, Chad Booc, Ryan Hubilla, Ali Macalintal ken adu pay.

Makipaset iti nailyan demokratiko a rebolusyon

Nagiyebkas ti pannakikaykaysa ken pammadayaw ti Makabayang Kilusan ng Bagong Kababaihan (Makibaka) iti sektor ti LGBTQ+ iti panagrambak iti Pride idi Hunyo. Inallukoy ti grupo ti sektor a makikaykaysa ken direkta a makipaset iti nailyan-demokratiko a rebolusyon a pudno ken aglayon a mangusat iti dana para iti naan-anay a pannakawayawaya ti LGBTQ+ kadwa ti umili a maddadanes ken magungundawayan.

Kanaig daytoy, nagballaag ti grupo nga agbalin a managbantay iti panagsabotahe ken panangallilaw ti imperyalismo ken amin a reaksyon iti dangadang ti LGBTQ+ ken panagrambak iti bulan ti Pride. Kuna ti Makibaka, balballikogen ti imperyalismo ti panagrambak tapno iyadayo ti LGBTQ+ iti dangadang laban iti diskriminasyon, nailyan a panagiddadanes ken panaggundaway.

Gungundawayan ti dadakkel a korporasyon ken dagiti pulitiko ti panagrambak iti Pride. Bayat nga ipatpatungpal dagitoy ken ti imperyalista a US ti arig na a pyesta a Pride, agtultuloy ti panangpatalinaed kadagiti linteg ken patakaran iti ekonomya ken pulitika nga ad-adda a mangikalkali kadagiti masa nga anakling-et nga LGBTQ+ iti gayonggayong ti kinaawan panggedan weno disente a trabaho a mangidurduon kadakuada kadagiti anti-sosyal nga aktibidad tapno agbiag.

Maysa a manipestasyon daytoy ti "rainbow washing" wenno "rainbow capitalism." Kaipapanan daytoy ti panangaramat kadagiti simbolo ken lenggwahe ti sektor ti LGBTQ+ tapno agganansya dagiti dakdakkel a korporasyon.



Immawag met ti grupo nga agbalin a kritikal dagiti Pilipino nga LGBTQ+ iti pangkultura nga opensi-ba ti imperyalista a US iti kapanuntan ken ugali ti masa. Ispasapknap ti imperyalismo ti burges-dekadente a kultura kas ti kamali a pagrukodan ti kinapintas ken dadduma pay a pagrukodan ti kina-LGBTQ+. Palpalataken met daytoy ti indibidwalismo ken *hypersexuality*.

Iti sango dagitoy a gandat ti imperyalismo, kinarit ti Makibaka dagiti kabilang iti sektor ti LGBTQ+ a dalyasaten ti dana ti naimpusoan a panangidaton ti panawen ken biag para iti nailyan-demokratiko a rebolusyon, labes iti bagbagi da.

Rumbeng a pagtuladan dagiti namartir a Nalabbaga a kumander ken mannagigubat ti New People's Army kas kada Val Mante (Ka Richard), Daniel Imperial, Wanda Gumban (Ka Waquin), Kevin Castro (Ka Facio), Jo Lapira (Ka Ella), Ciela Pacaldo (Ka Alena), Jethro Isaac Ferrer (Ka Pascual), Kal Peralta (Ka Rekka), Queenie Daraman (Ka Kira), Dee Supelanas (Ka Dahlia) ken adu pay. Nasken a padayawan ti panangidaton da ti pigsa, laing, kinatured ken biag para iti masa ken nadumaduma a tay-ak ti rebolusyonaryo a trabaho. **AB**



6

bulan a saan a nainkalintegan a naibalud ni Tang Pruding (Prudencio Calubid Jr) iti laksiid ti agpukpukaw nga ebidensya a saan nga isuna ni Prudencio Calubid, konsultant iti saritaan iti kapya ti NDFP, a biktima ti pwersado a panangpukaw ti estado idi pay 2006.



iti corals iti **Paradise Reef** ti natay gapu iti konstruksyon ti Samal Island-Davao City Bridge.

5 tawen ti pasista nga Anti-Terror Law

dumanonen ti **227** ti nalipit, **34** ti naikategorya a "terorista," **193** ti nakasuan ken **30** ti naibalud iti sidong daytoy. **Innem** kadagiti kaso ti naibasura.

₱50 laeng ti nayon a sweldo

nga inaprubaran ti NCR wage board tatta a tawen, kabatog laeng ti 0.4% iti gastos dagiti kapitalista, ken awan pay 2.5% iti sapul da.

Daytoy a nayon ket kurang ti ₱576 tapno danunen ti makabiag a sweldo.

27%↑

laeng ti kabuklan nga inngato iti presyo ti gasolina ken 37% laeng para iti diesel ti nairolbak manipud iti 11 daras a panangingato daytoy dagiti kumpanya iti langis manipud Enero 1 agingga Mayo 25, 2025.

20%↓

inbagsak ti nakalap a lames iti intero a pagilyan idi Mayo gapu iti nadawel a panawen.

31% Inngato ti utang ti Pilipinas, manipud ₱12.8T agturong ti ₱16.92T, iti 3-tawen a panagtakem ti rehimen Marcos.



12 ALDAW

ti inbayag ti US ken Israel laban iti Iran, nu sadinno a binomba ti US ti tallo a napapateg a pasilidad nukleyar para iti panagsukisok ti Iran usar ti 30,000-libras a bomba.

Padagsen a buwis iti umili, palag-an met kadagiti gangannaet

Kadagiti napalabas a dekada, dumagsen a dumagsen ti agtutuon a buwis a maipabpabaklay iti umili a Pilipino, nga ad-adda a nangilumlom kadakuada iti gayong-gayong ti kinarigat. Iti bangir na, lumaglag-an a lumaglag-an ti buwis a masingsingir kadagiti kadakkelan a burges kumprador ken dagiti gangannaet ken lokal a kumpanya, nga ad-adda a mangpadpadakkel iti ak-akupen da a ganansya.

Manon a dekada a sinagsagaba ti umili ti Value Added Tax (VAT) kadagiti pinakabasaran a produkto a taraon ken serbisyo, nga idi damo ket 10%, ngem idi agangay ket nagbalin a 12%. Idi 2016, dimmanon iti ₱622 bilyon ti nakolekta a VAT a dimmakkel pay kadagiti simmaruno a tawen. Idi 2013, mapatta-patta a bukuklen daytoy ti 18.9% ti kabuklan a rebenyu ti gubyrno, manipud iti nababa a 7.9% idi 1989. Ad-adda a dimmagsen ti baklay ti umili idi naipatungpal ti TRAIN Law a nangipataw ti nayon nga *excise tax* kadagiti produkto a petrolyo, sigarilyo, arak, nasasam-it a mainom ken daduma pay.

Idi Hunyo, ninayunan pay ni Marcos ti padagsen iti umili iti panangipasa ti linteg a Digital Services Tax a nagipataw ti 12% a VAT kadagiti serbisyo a dumaldalan iti *internet*. Sinaklaw ti baro a linteg dagiti *online shopping platform* kas ti Shopee ken Lazada, dagiti *website* para kadagiti agbirbirok ti *freelance* a trabaho kas ti Fiver ken Upwork ken *streaming platform* kas ti Netflix ken Spotify. Ti buwis ket baklayen dagiti ordinaryo a *content creator*, *online seller*, *freelancer* ken aggatgatang. Mapatta-patta a kumaud ti rehimen US-Marcos ti ₱105 bilyon manipud ditoy iti sumaruno a lima a tawen.


Sakbay daytoy, naobliga dagiti aglaklako kadagiti *online shopping platform* nga agparehistro iti Bureau of Internal Revenue (BIR) ken agbayad ti 1% a buwis manipud iti kabuklan a sapul da. Isaruno pay ti rehimen Marcos ti buwis kadagiti plastik a *single-use* wenno maminsan laeng a mausar, kasta met ti buwis para

kadagiti agus-usar ti motorsiklo.

Iti bangir na, ad-adda a dimmakkel ti sapul dagiti dadakkel a lokal ken gangannaet a kumpanya gapu iti pinababa pay a buwis a masingsingir kadakuada iti sidong ti CREATE MORE Law. Tallo pay a linteg ti naipasa idi 2024 nga ad-adda a nangikissay iti buwis ti burgesya komprador ken dadakkel a lokal ken gangannaet a kumpanya. Dagitoy ket ti Ease of Paying Taxes Act, Real Property Valuation and Assessment Reform Act, Capital Markets Efficiency Promotion Act. Amin dagitoy ket paset ti Comprehensive Tax Reform Program a naipatungpal idi panawen ti rehimen Duterte ken intuloy ti rehimen US-Marcos.

Pinaboran dagitoy a linteg dagiti negosyante babaen ti nasimsimple a sistema ti panagbayad ti buwis, panangkissay ti buwis iti sapul, panangkissay ti multa kadagiti saan a nakabayad iti usto nga oras, panagibaba ti buwis iti panaggatang ken panagilako kadagiti sosyo ken panangited kadagiti insentibo kas ti *tax holiday*, libre wenno nababa a singir iti kuryente, nababa a buwis iti daga, amnestiya iti panagbayad ti buwis ken dadduma pay.

Dumanon iti ₱5.9 bilyon a buwis iti unos ti tallo a tawen ti bawas iti koleksyon ti reaksyunaryo nga estado iti CREATE MORE Law pay laeng. Iti sidong ti immuna a CREATE Law, dumanon iti ₱476.8 bilyon ti naikissay iti buwis dagiti dadakkel a negosyante iti buwis ti dadakkel a negosyante iti umuna a lima a tawen pay laeng.



Maaw-awagan a regresibo wenno paatras ti sistema ti panagipataw ti nangangato a buwis kas ti VAT ken *excise tax* kadagiti produkto ken serbisyo a gatgatangen wenno us-usaren ti umili. Dagitoy a buwis ket immuna a naipataw iti diktar ti World Bank (WB) kadagiti atrasado a pagilyan kas ti Pilipinas tapno masigurado a makaanay ti makolkolekta a sapul ti pagilyan ken mabayadan dagiti gangannaet nga utang. Idi dekada 1980, paset daytoy dagiti kundisyon ti pautang ti WB ken International Monetary Fund. Segun mismo iti WB, ti buwis kas ti VAT ti kalakaan a pagalaan ti sapul ti estado gapu ta narigat a liklikan daytoy ken dagiti aglaklako ket agbalbalin a para kolekta met ti buwis. Kinapudno na, mamati ti WB a kurang pay ti VAT ken "adda pay espasyo" tapno ingato ti sapul iti VAT iti Pilipinas.

Iti laksid ti makolkolektar a buwis manipud iti masa nga anakling-et ken petiburges, bassit a porsyento laeng daytoy ti mapmapan iti serbisyo iti gimong kas ti edukasyon ken salun-at wenno pondo para iti agrikultura. Adda iti 20% met ti kabuklan a pondo ti gubyrno iti tinawen ket mapmapan laeng iti korapsyon wenno diretso iti bulsa dagiti buruk-rata-kapitalista. Ti nakaro ket maar-aramat pay ti buwis iti pasismo ti estado babaen ti panaggatang ti armas, pagpondo iti NTF-Elcac ken dagiti pasista a kampanya.

AB

Malapyudal a panangidadanes kadagiti mannalon ti nateng idiay Bukidnon ken Lanao del Sur

Maysa nga ektarya a daga wenno basbassit pay ti kadawyan a taltalonen dagiti nakurapay ken makintengnga a mannalon iti nagbeddeng ti Bukidnon ken Lanao del Sur. Kadawyan nga agmulumula da ti nateng kas ti karabasa, sili, repolyo, patatas, karots, kamatis, Baguio beans, taban, tarong, brokoli ken uray kamote ken mais. Agtutuo a malapyudal a panangidadanes ti mapadpadasan da, manipud iti kinaawan ti daga, usura, nangina a gastos iti produksyon agingga iti nalaka a linnakuan ti produkto.

Panaggundaway iti produksyon

Gapu ta awan ti naan-anay a puonan, kadawyan kadagiti mannalon ti agutang para iti produksyon. Pumapauneg da kadagiti katulagan ti pautang kadagiti lokal a "pinansyer" wenno usurero nga addaan managgundaway nga urnos ken interes. Partikular kadagiti kanatengan, ti interes iti utang ket adda ti langa ti panagbibingay iti kabuklan nga ani ken sapul.

Para kadagiti mannalon nga awanan ti daga, agraraira ditoy ti sistema a "maintainer." Iti sidong daytoy, ti agtagikua ti daga (nga umak-akto a pinansyer) ket agpautang iti mannalon tapno mulaan ti daga a maipapausar kenkuana. Maar-aramat ti pautang para iti panagsagana iti daga, bin-i, abono, pestisidyo, herbisidyo ken panangdan kadagiti mangmangged-talon. Iti kastoy, bukbukodan ti mannalon ti mangibaklay iti gastos iti produksyon ken panagtrabaho.

Nayon a padagsen iti mannalon ti panagkusit ti sumagmamano a pinansyer iti presyo dagiti *farm input* a maipapautang kadagiti mannalon. Iti maysa a kaso, prespresyuan ti pinansyer ti sag-**₱1,100** a galon ti Roundup herbicide iti gatad a **₱1,700**.

Saan a mammaminsan ti gundaway a malugluga dagiti mannalon ti nateng nu bumagsak ti presyo ti ginatanganan iti produkto wenno mata-

maan ti kalamidad. Gapu ditoy, nakagalut da iti siklo ti balbaliw a panagutang iti pinansyer para iti sumaruno a panagmumula agingga a lumned da iti utang.

Panaggundaway iti linnakuan

Ip-ipan dagiti mannalon ti produkto da a nateng idiay Cagayan de Oro City, adayo kadagiti pagmulaan da. Ip-ipan da dagitoy iti bagsakan ti nateng iti Barangay Bulua nu sadinno a kadawyan a maigabgabsuon kadagiti bodega dagiti *financier-dealer* wenno *dealer*.

Masingsingir ti mannalon ti **₱20** kada sako (100 kilo kada sako) iti panagdiskarga ti produkto da iti bodega. Agbaybayad da met ti **₱2.5-₱3** kada kilo (**₱250-₱300** kada sako) nga abang iti bodega kadagiti *dealer* wenno iti sumagmamano a kaso ket 10% iti gatad ti lako iti produkto a nateng.

Iti bagsakan, maikedkeddeng ti presyo dagiti produkto a nateng depende iti kaadu ti suplay ken panagpusipos ti linnakuan. Awan ti kunsiderasyon dagiti *dealer* iti gastos dagiti mannalon iti panagikeddeng ti kabuklan a presyo. Dagiti *dealer* met ti mangikedkeddeng iti pagrurkodan ti panagpresyo depende iti kalidad ti nateng. Isuda met ti mangikedkeddeng ti presyo ti linnakuan iti komersyante. Nu saan a mailako ti *dealer* ti produkto, isubli na iti mannalon.



Iti linnakuan ti taban kaspangarigan, ti kada kilo ti taban a ginatang na ti **₱50** iti mannalon ket mabalin nga ilako ti *dealer* iti komersyante iti gatad a **₱70**. Nu mailako na ti 5,000 kilo ti taban, kumita ti *dealer* ti **₱15,000** manipud iti abang iti bodega ken **₱100,000** iti panangilako daytoy iti komersyante. Kumita isuna ti *gross* wenno kabuklan a **₱115,000** sakbay nga ikissay na ti tangdan ti trabahador ken dadduma pay a gastos na.

Iti paset ti mannalon, kumita laeng isuna ti **₱250,000** iti 5,000 kilo. Maikissay ditoy ti gastos iti produksyon a **₱205,132.40** ken mabati ti **₱44,867.60**. Nu sumrek isuna iti sistema a *financing* wenno *maintainer*, ti laeng mabati kenkuana ket **₱22,433.80**.

Malaksid ditoy, dakkel ti epekto iti presyo ti ismagling ken dagiti kartel a mangkonkontrol ken mangmanipula iti suplay. Ad-adda a maguyguyod pababa ti presyo ti lokal a produkto a nateng tunggal aglayus ti *imported* a nateng a palpalubosan ti gubyerno.

Kas prodyuser ti taraon, ipetpetteng dagiti mannalon ditoy ti kinatalged iti daga a taltalonen da; ti nainkalintegan a presyo dagiti produkto ken panangikkat ti nadumaduma a wagas tapno baraten ti produkto da. Awag da met ti nainkalintegan nga interes iti pautang; panangingat ti tangdan dagiti mangmangged-talon ken panangibaba ti abang iti bodega wenno komisyon dagiti *dealer*.

Pammapatay kadagiti sibilyan ken hors de combat, naimaldit idiay Masbate, Leyte ken GenSan

Kadagiti napalabas a lawas, naimaldit ti lima a biktima ti pulitikal a pammapatay dagiti pwersa ti estado. Malaksid ditoy, adda met dagiti kaso ti panag-aresto, pammaltog ken panaglipit. Nayon dagitoy iti agtutuoan a krimen ti rehimen US-Marcos iti tallo a tawen na iti poder.

Idiay Masbate, rinatrat ti bala ken napatay dagiti pwersa ti estado ti 25-anyos a sibilyan a ni Joey Oas iti Barangay San Carlos, Palanas idi Hunyo 29. Pinaruar da isuna a "limmaban" ken naalaan ti maysa a pistola, magmagasin ken bala. Pabpabasolen da isuna a kameng ti *sparrow* yunit ti New People's Army (NPA).

Idiay Leyte, ingagara a pinapatay ti 93rd IB ken 802nd IBde ti dua a *hors de combat* a kameng ti NPA ken maysa a medik idi Hunyo 18 iti Barangay Cogon, Carigara. Masakit ken agpapaimbag idi da Juanito Selleca Jr (Ka Tibor/Ka Rey) ken Sadam Paclita (Ka Dimple) idi rauten ken pinalto-paltogan dagiti soldado. Kadwa da a pinapatay dagiti soldado ni Lino Delante (Ka Dodong), maysa a medik a mangay-aywan kadagiti pasyente. Saan nga armado ti tallo.

Idiay General Santos City, pinalto-paltogan ken napatay dagiti saan pay a mabigbig a tao ni Ali Jejhon S. Macalintal, maysa a brodkaster iti radyo, idi Hunyo 23 iti Barangay Lagao. Ni Macalintal, maysa a *transwoman*, ket nagbalin nga aktibo a kameng ti progresibo a grupo manipud idi 2002. Idi 2024, nagulat ni Macalintal a liplipiten ken sursuroten isuna dagiti ahente ti Task Force Gensan. Mano nga aldaw sakbay a pinaltogan da, nakaawat kadagiti pangta iti biag na.

Panag-aresto. Lima nga aktibista a pangkultura ti inaresto dagiti pwersa ti estado idi Hunyo 27 iti Barangay Pasong Buaya II, Imus, Cavite. Iti kapatur ti oplan pinta da, sinurot, pinalawlawan, pinangtaan usar ti paltog sakbay nga inpan isuda iti barangay *hall*. Temporaryo a nawayawayaan da idi Hulyo 1 ken sumangsango kadagiti kaso a *malicious mischief* ken bandalismo.

Pammaltog. Idiay Negros Oriental, dursok a nagputok-putok ti paltog dagiti "trigger happy" a soldado ti 62nd IB iti Sityo Putat, Barangay Humay-humay iti Guihulngan City idi Hunyo 23.

Iti sumaruno nga aldaw, pwersado a sinerrek dagiti soldado ti balay ni Bobby Gemodo iti Sityo Laos, Barangay Binobohan iti syudad tapno lipiten isuna. Napan met dagiti soldado iti balay ni Mario Noyad iti Sityo Natae, Barangay Binalbagan, Canlaon City tapno butbutngen ken pangtaan isuna.

AB

Pudno a kapya, awag dagiti tao't simbaan ken dadduma pay a sektor

NAANGAY IDIAY ROME, Italy idi Hunyo 27-28 ti "Pagtanim: Sowing Seeds of Faith Solidarity for the Filipino People's Struggle for Peace," maysa a taripnong ti nasurok 70 a mangibagi ti nadumaduma a pammati ken dagiti grupo iti karbengan-tao manipud iti 13 a pagilyan. Naiyaramid daytoy iti sango ti madagdagus a pagkasapulan para iti panagkaykaysa iti intar ti tao't simbaan tapno suportaran ti dangadang dagiti Pilipino para iti kapya.

Iti panangidaulo ti Council of Leaders for Peace Initiatives, insayangkat met dagiti mangibagi ti nadumaduma a grupo ken sektor ti Mindanao-wide Peace Conference idi June 24 idiay Cagayan De Oro City. Ginuyugoy da ti umili a suportaran ti saritaan iti kapya iti baet ti GRP ken NDFP, tapno sungbatan ti ramut ti armado a risiris iti pagilyan.

Tignay protesta ti umili a Kenyan, naranggas a naduprak

DUMANON ITI 16 a raliyista ti napapatay ken 400 a dadduma pay ti nadundunor idi naranggas a dinuprak ti rehimen US-Ruto ti Kenya dagiti protesta ti umili idi Hunyo 25. Ti protesta ket paset ti pananglagip iti serye dagiti dadakkel a demonstrasyon a naisyangkat idi napalabas a tawen laban iti neoliberal a gakat a Finance Bill 2024, kumarkaro a kinarungsot ti pulis ken panagikuspil ti estado.

Malagip a napaatras dagiti dadakkel a tignay idi 2024 ti rehimen US-Ruto iti plano a panagipataw ti nadagdagen a buwis a diktar ti International Monetary Fund (IMF) nga ad-adda a mangparigat iti masa a Kenyan. Tapno tuso a mailusot dagiti buwis, paset-paset daytoy nga inpasa ti parlamento ti Kenya iti napalabas a tawen.

Naisyangkat dagiti tignay idiay Nairobi, Mombasa, Kisii ken dadduma pay a syudad. Awit da dagiti bandera ti Kenya ken nagpukkaw ti panawagan a "Ruto Must Go" (Palayasin si Ruto) ken "Occupy Statehouse" (Sakupen ti Statehouse wenno pagtaengan ni Ruto kas mangidaulo ti gubyrno). Awit da met kadagiti protesta dagiti ladawan dagiti pimmusay idi napalabas a tawen iti kinaranggas ti pulis laban iti demonstrasyon.

Nagiyebkas ti suporta ken pannakikaykaysa iti dangadang ti umili a Kenyan ti League of Peoples' Struggles Africa ken West Asia Regional Committee. Inallukoy da dagiti Kenyan nga ad-adda pay nga agpursigi iti sango ti kumarkaro a panagikuspil.

"Rumbeng laeng nga agtuloy iti panag-organisa kadagiti Kenyan ken agisayangkat kadagiti aksyon masa tapno iyabante ti awag para iti nailyan a wayawaya ken demokratiko a karbengan," pablaak ti komite. Kas iti naipamatmat ti nasaknap a demonstrasyon ti umili a Kenyan idi 2024, mamati ti ILPS a kabaelan nga iduron ti dumakdakkel a tignay ti rehimen Ruto nga isanud dagiti bulok a patakaran daytoy.